

上好的選擇

A：秦慳

B：秦嬌

上台行禮

A：喂！秦嬌，天氣若會遮爾仔熱。

B：是啊！真正是毋知欲覘去佢位，啊！現此時閒閒，冰店佇頭前，順繼來去食枝仔冰。

A：這咧方法擱袂標，毋過愛開錢阮無愛。你喔！干焦知影欲食，真正是親像古早人講的：「講著食，就爭破額。」

B：這——「有食有行氣，有燒香是有保庇」，你真慳，〈秦慳〉你頭殼精光，就換你來澎風。

A：才無像你「蓋頭蓋面——胡蠅咧戴龍眼殼」，尚無來去泔水運動，嘛較健康。

B：今——四界的大溝是水濁濁無清氣，抑是欲去泡消毒水的游泳池，較趣味。

A：唉！咱著愛會曉選擇天然的海邊，抑是水沖流落來的天然清水，正港是「一兼二顧，摸蛤仔兼洗褲」。

B：遮爾久無落雨，這水溝是焦涸涸，今「長工就愛望落雨」。

A：你干焦會曉「龜笑鰲無尾」，店頭敢有賣龜皮，抑是賣啥貨。

B：換我來講予你鼻芳，事事項項，我來排擔大放送。

A：我看你是「便所內彈吉他—臭彈」。

B：火車行到伊嘍，阿麥伊嘍 tiuh，唉唷磅空內，……

A：喂！喂！喂！你這「黑斫仔是貯什物油」，是欲去佗位，有水通泗。

B：我欲坐火車來去旅行，兩人相招來跋感情。

A：這火車欲行就愛行鐵枝，是幾點幾分欲到嘉義。

B：聽講嘉義查某嬌閣甜，欲嫁就愛來通知。

A：莫閣落下顏矣，我看你是「破雨傘---興展」啦。

B：「講到予你捌，喙鬚就好拍結」，坐來去阿里山迤迤，省錢閣環保。

A：坐火車閣有 kah 啥物寶，我呀無近視，那會看攏無。

B：你是臭耳聾勢翻話，閣會玲瓏楚，坐大眾運輸較省錢安全無問題，
順繼會當來去咁高山茶。

A：人「賣茶是講茶芳，賣花是講花紅」，高山茶是貴參參，莫買才袂
予人笑戇。

B：免緊張，換來山頂看神木，人清爽，逐粒山頭會當四界 lōng。

A：這免開錢，樹仔拄天，迴到雲頂是有夠嬌，這個選擇我有恰意。

B：咱緊來看，這規大片的山林就是咱銀行的存款。

A：看看看！慢來个就減看一半。

B：毋是咧，賣雜細，嘛毋是咧賣家伙，是幾若百冬的樹欉有夠濟。

A：著啦！這涼風，真正是上天然的，樹葉仔攞---咧、攞---咧，閣袂
輸咧共咱拍招呼，心情清爽無甘苦。

B：「無錯---這規樣好好」，緊來！緊來！你共鼻看覓。

A：喔！「親像關公賣豆腐」——簡單啦！聽我講，樹仔芳、蜜芳，花芳、天然的精油予你軟了精神好、袂佻人花膏膏。

B：真正是虎鼻師，閣報人知；平地佻山頂的空氣，欲那會得比，敢若是地比天，無鹽咧比西施。

A：你看我祛遮濟，有玻璃、有塑膠、銅管仔、紙……

B：喔！你真費氣，是會當賣佻濟錢。

A：人講「小雨欲堪得捷落」，毋但是錢的問題，迫迫兼做環保，環境清幽無糞埽。

B：真勢，人講：若欲「觀星望斗，不如播田掌草。」

A：真嬌，著啦！咱「講甲規山坪，不如一人做一件。」

B：真正會曉選擇是上好，生活快樂無煩惱。

秦勢、秦嬌落台行禮。